



**Komunikadu Imprensa**  
**13 Dezembru 2021**  
**Parlamentu Nasionál**

**Parlamentu Nasionál aprova orsamentu adisionál ba Defensória Públiku**  
**JSMP apresia vontade di'ak deputadu sira**

Parlamentu Nasionál (PN) iha loron 09 Dezembru 2021, liuhusi reuniaun plenária PN iha diskusaun no votasaun espesialidade ba Orsamentu Jerál Estadu (OJE) 2022 konsege halo aprovasaun ba orsamentu adisionál Defensória Públiku nian iha votasaun espesialidade ba orsamentu ministériu justisa nian.

Proposta orsamentu adisionál Defensoria Públiku 2022 ho total US\$245.000.00 ne'ebé fahe ba kategoria bens no serbisu hamutuk US\$100,000.00 ho nia rubrika sira mak hanesan viazen lokal, pagamentu ba dívida sira, manutensaun ba veiklu sira, fonesimentu material eskritóriu. Enkuantu USD\$145,000.00 ba kapitál minór ne'ebé sei fahe ba rubrika sira hanesan sosa veiklu no akizasaun ba ekipamentu mobiliáriu ba edifísiu Defensoria Públiku foun iha Munisípiu Bobonaro no Ermera.

“JSMP apresia ho konsiderasaun no vontante di'ak husi deputadu sira proponente no mós deputadu tomak ne'ebé aprova proposta adisionál Defensória Públika tanba importante no nesesáriu duni. Liuhusi orsamentu adisionál ne'e, bele hatan difikuldade sira balun ne'ebé durante tinan barak Defensoria Públiku infrenta liuliu iha facilidade sira no manutensaun,” dehan Diretora Ezekutiva JSMP, Ana Paula Marçal.

JSMP husu atu deputadu sira kontinua tau konsiderasaun hodi fó votu afavór ba proposta adisionál sira seluk husi instituisaun judisiáriu sira hanesan tribunál, Ministériu Públiku, Komisaun Anti Korrupsaun no Polisia Sientífika Kriminál ne'ebé submete ona ba Parlamentu liuhusi deputadu proponente sira.

Proponente ba proposta adisionál rua ne'e (proposta nú. 51 no 52 kona-ba orsamentu adisionál ba bens no serbisu no kapitál menór ba Defensoria Públiku) mak hanesan deputadu Joaquim dos Santos, deputadu Françisico de Vasconcelhos no Deputadu Luis Roberto da Silva.

Atu hetan infomasaun kompletu bele kontaktu :

Ana Paula Marçal

Diretora Ezekutiva JSMP

Email: [ana@jsmp.tl](mailto:ana@jsmp.tl)

website: <https://jsmp.tl/>